

四庫全書

史部

欽定四庫全書

史部
廣西通志卷一百一

詳校官給事中臣鄧文泮

檢討臣德生覆勘

總校官進士臣朱鈞

校對官編修臣盧遂

謄錄監生臣王元愷

欽定四庫全書

廣西通志卷一百一

藝文

歷朝

疏

論新建伯撫勦地方功次疏

霍韜

竊見新建伯南京兵部尚書兼都察院左都御史
王守仁奉命巡撫兩廣已將田州思恩撫處停當

隨復勦平八寨及斷藤峽等賊臣等皆廣東人與賊鄰壤備知各賊為患實跡嘗竊切齒蹙額而歎曰兩廣良民何不幸生鄰惡境又嘗竊計曰何日得一好官員勦平各賊俾良民各安其生而頑民染患未深者亦得革心向化乃今恭遇聖明特起王守仁撫勦田州思恩地方臣等竊謀曰兩廣自是有底寧之期也聖天子知人之澤也是役也臣等為王守仁計曰前巡撫動調三省兵若干萬梧

州三府積年儲蓄軍餉費用不知若干萬復從廣
東布政司支去庫銀若干萬米不知支去若干萬
殺死疫死狼兵鄉兵民壯打手不知若干萬僅得
田州安靖五十日自是而思恩叛矣弔巖賊出圍
肇慶矣殺數千家矣此賊併時同出蓋與田州思
恩東西相應者也若王守仁者乘此大敗極敵後
仰承聖明特擢之恩卽合四省兵力再支庫銀百
餘萬支米數百萬勦平田州報功級數萬人亦

且曰天下大功也然而守仁不役一卒不費斗糧
宣揚陛下聖德遂致思恩田州兩府頑民稽首來
服其奉揚聖化以來遠人雖舜格有苗何以過此
臣等是以歎服王守仁不惟能肅將天威實能誕
敷文德也若八寨斷藤峽又非田州思恩比也天
下十二省俱多平壤惟廣西獨在萬山之叢其土
險其水迅其山之高者有猿猴不度飛鳥不越者
故諺語曰廣西民三而賊七由山高土惡氣習兇

悍雖良民至者亦化為賊也八寨賊洪武年間所不能平
斷藤峽成化八年都御史韓雍僅得討平及今五十餘年
遺孽復熾柳州慶遠鬱林府江諸路時出劫掠官兵亦
屢請征之若八寨賊則自國初至今未有輕議征勦者蓋
謂山水兇惡進兵無路消息少動賊已先知一夫控險萬
兵莫敵以故一百六十年間曾未議及賊亦恃險肆恣時
時出攻圍城堡殺掠良民何啻萬計四方頑民犯罪脫
逃投入八寨則有司不敢追攝矣鄰近流賊避兵追勦

投入八寨則官兵不敢誰何是八寨者實四方寇賊淵
藪也斷藤峽又八寨之羽翼也廣西有八寨諸寇猶人
有心腹疾也八寨不平則兩廣無安枕期今王守仁沉機
不露掩賊不備一舉而平之百數十年豹虎窟穴掃而
清之如拂塵然非仰藉聖人神武不殺之威何以致此
臣等是以歎服王守仁能體陛下之仁以懷綏田州思
恩向化之民又能體陛下之義以討服八寨斷藤峽梗
化之賊也仁義之用兩得之矣謹按王守仁之成功有

八善焉乘湖兵歸路之便則兵不調而自集一也
因思田効命之助則勞而不怨二也機出意外則
不及遯所誅者皆積年渠惡非往年濫殺報功者
比三也因歸師以討逆賊無糧運之費四也不役
民兵不募民馬一舉成功民不知擾五也平八寨
平斷藤峽則極惡者先誅其細小巢穴可漸施德
化使去賊從良得撫勦之宜六也八寨不平則西
而柳慶東而羅旁線水新寧恩平之賊合數千里

共為窟穴雖調兵數十萬費糧數百萬未易平復
今八寨平定則諸賊可漸次撫勦兩廣良民可漸
安生業紓聖明南顧之憂七也韓雍雖平斷藤峽
賊矣旋復有賊者實當爾時未及區畫其地為經
久圖歷五十年之生聚則賊復熾盛也亦宜今守
仁既平其巢窟即徙建城邑以鎮定之則惡賊失
險後時固不能為患逋賊來歸不日且化為良民
矣誅惡綏良得為民父母之體八也或者議王守

仁則曰所奉命撫勦田州思恩也乃不勦田州則亦已矣遂勦八寨可乎臣則曰昔吳楚反攻梁景帝詔周亞夫救梁亞夫不奉詔而絕吳楚糧道遂破吳楚而平七國安漢社稷夫不奉詔大罪也景帝不以罪亞夫何也傳曰閩以內寡人制之閩以外將軍制之又曰大夫出疆有可以安國家利社稷專之可也古之道也是故周亞夫知制吳楚在絕其食道而不在於救梁也是故雖有詔命猶不

受也惟明君則以為功若腐儒則以為罪今王守仁知田州思恩可以德懷也遂納其降而安定之知八寨諸賊百六十年未易服也遂因時仗義而討平之仁義之用達天德者也雖無詔命先發後聞可也而况有便宜從事之旨乎或者又曰建置城邑大事也區畫錢糧戶部職也不先奏聞而輒興功可乎臣則曰古者帝王千里之內自治千里之外付之侯伯而已是豈堯舜湯武聖智反後世

不如哉蓋慮輿圖既廣則智力不及與其役一已
耳目之力而無益於事孰若以天下賢才理天下
事為逸而有功也是故帝王之職在於知人而已
既知其人之賢而委任之矣則事之舉錯一以付
之而責其成功若功效不孚乃制其罪可也今既
任之又從而牽制之則豪傑何所措手足乎是故
王守仁之平八寨也所殺者賊之渠魁耳若逋逃
者固未及殺也乘此時機建置城邑遂招逋逃之

賊復業焉則積年之賊皆可化為良民也夫此機會撤兵而歸俟奏得旨乃興版築賊漸來歸又漸生聚據險結寨以抗我師雖欲築城亦不能矣昔者范仲淹之守西陲也欲築大順城慮敵人爭之乃先具版築然後巡邊急速興事一月工成賊覺而爭之已無及矣爾時范仲淹若俟奏報豈不敗乃事哉王守仁於是建置城邑之役蓋計之熟矣錢糧夫役固不仰足戶部而後有處也其以一肩

而分聖明南顧之憂可謂賢矣不以為功反以為過可乎先是正德十四年宸濠謀反江西兩司俛首從賊惟王守仁同御史伍希儒謝源誓心効忠不幸奸臣張忠許泰等欲掩王守仁之功以為己有乃揚諸人曰王守仁初同賊謀及公論難掩乃又曰宸濠金帛俱王守仁伍希儒謝源滿載以去當時大學士楊廷和尚書喬宇亦忌王守仁之功遂不與辯白而黜伍希儒謝源俾落仕籍王守仁

不辯之謗至今未雪可謂默啞之寃矣夫國家論功有二道焉有開國効功之臣焉有定國拯危之臣焉開國之臣成可侯也敗則虜也雖勿崇焉可也惟禍變倏起社稷安危凜乎一髮効忠定亂之臣則不可忘也何也所以衛社稷也昔者王守仁之執宸濠也可謂定亂拯危之功矣奸人猶或忌之而謗其短夫如是則後有事變誰肯効忠乎甚矣小人忌功足以誤國也臣等是以歎曰王守仁

等江西之功不白無以勸勵忠之臣若廣西之功
不白又無以勸策勲之臣是皆天下地方大慮也
王守仁大臣也豈以功賞有無為重輕哉第恐當
時有功之人及土官立功之人視此解體則在外
撫臣遂無所激勸以為建功之地耳臣等廣人也
目擊八寨之賊為地方大患百數十年一旦仰賴
聖明任用守仁以底平定不勝慶忭今兵部功賞
未見施行戶部覆題又復再勘臣恐機會一失大

功遂沮城堡不得修築逋賊復據巢穴地方不可
勝慮也是故冒昧建言惟聖明察焉乞早裁斷俾
官僚早得激勸城寨早得修築逋賊早得招安良
民早得復業嶺海之外歌詠太平祝頌聖德實臣
等所以報陛下知遇一節也亦臣等自為地方大
慮而不得已也

兩廣鹽利疏

黃佐

照得兩廣用兵全資鹽利而鹽利之徵則出之客

商而不取之於竈蓋竈丁所辦之鹽則專客商支額無額外徵備軍門之數商人支額官鹽有限數私鹽數多私鹽之利遠過官鹽數倍自天順成化以來至都御史葉盛韓雍吳琛朱英宋旻屠滹秦絃閔珪唐珣鄧廷瓚劉大夏潘蕃熊繡併臣等相繼總督軍務於此因地方連年用兵錢糧無處出辦商販私鹽數多勢難革而法難行所以或奏請施行或便宜處置而有此鹽利之徵也法之立於

行鹽地方各立鹽場廣西則於梧州廣東則於韶州南雄肇慶清遠商人到彼投稅者正鹽一引帶餘鹽六引正鹽一引抽銀五分餘鹽一引抽銀壹錢餘鹽一引更有多餘鹽觔許令自首免其沒官每一引令其納銀二錢此鹽法之大槩也相沿行三四十年通融府庫充實地方逐年用兵勦賊買糧賞功等項甚為有賴正德六年廣東監察御史解冕條陳十事內一件議措軍餉查得先該戶部

郎中陳俊巡撫都御史葉盛題准廣東鹽課提舉司鹽引從梧州往廣西地方併湖廣衡永二府發賣每鹽一引納米二斗後該都御史韓雍見得收積米多議令每官鹽一引許帶餘鹽四引官鹽一引納銀五分餘鹽每引納銀一錢南雄府亦然後該都御史秦紘案令官鹽一引許帶餘鹽六引仍前照例抽收此外又有多餘鹽勛准令自首每引抽銀二錢蓋正鹽一引

止帶餘鹽一引乃祖宗成法一引許帶餘鹽六引巡撫權宜茲欲止帶一引則軍餉無處措辦合無酌量每官鹽一引許帶餘鹽三引仍量其地方鹽價貴賤抽收軍餉如往南雄韶州二府發賣餘鹽每一引納銀一錢五分往清遠肇慶及惠潮州以上江西行鹽地方發賣每引納銀七分其在廣州雷廉高瓊等府縣往欽州靈山領運廣西發賣者餘鹽一引納銀五分有引

官鹽俱免納銀但有夾帶多餘鹽觔盡罰入官
不准自首如此則官商兩便軍餉不致虧少等
因已該都御史林富依擬施行去後竊照兩廣
係古百粵之地民搖襍處寇盜縱橫歲用兵征
勦錢糧支用不貲加以遞年水旱相仍人民饑
饉處置賑恤調兵防守歲無虛月倉庫儲蓄有
限各項供費無窮其兩省布政司處雖有銀兩
各有頭項擅難把別項動支遞年征勦因地方

廣潤山嶺險遠所調漢土軍卒多則就用
十萬之上少亦不下六七萬之數方敢行事况
賞犒出軍將卒并各處哨守官兵及修城船打
造銀牌買辦紅料硝磺制造軍兵器械收買馬
匹鞍轡等項凡軍中合用之物無不賴於此舍
此再無出辦之路論之者但知鹽利銀兩收有
前項數目執稱甚多欲要減免其費出之多關
係之大遇急無辦之患臨時缺乏之憂皆所不

顧是以不及其事者隨人意言之甚易殊不知
當其事者利害切身值之亦甚難也自正德二年
查盤起解之後倉庫遂無餘積比一舉動輒告缺
乏况商人許令自告仍有不盡之數令自首則私
鹽盛行肆無忌憚又何可言是縱客人以罔厚利
虧軍餉以悞大事其為靖安地方之計甚非所宜
鹽丁所辦之課已給與商此等之徵則出自商人
與鹽竈丁萬無相干以此而恤鹽丁非臣所敢言

也況鹽商獲利頗多盤獲私鹽人免問罪鹽免入官惟以此數而責令出辦法為甚輕而販納亦甚易俱欣然樂從畧無難意今益商人而縱私販虧官課而悞大事以此而措置軍餉又非臣所敢知也但用兵惟此糧賞非糧無以聚兵非賞無以勵功書曰峙乃糗糧無敢不逮汝則有大刑孟子曰師行而糧食古有明訓今惟欲希寬恤之美名而不顧地方之大患論事諸臣固不言其非盡善之

謀其行據議處者或亦似無遠大之見此豈經久可行之法否乎即今儲蓄已不甚多若不急復舊規則軍餉日虧錢糧日減遇地方多事聚兵無糧賞功無物臣等束手無措未免具奏請給內帑縱蒙俯允而往返稽延悞事非細况前項事情行之年久上下皆便商人甚為有益絕無怨言決難輕議設有餘積收貯在官足彰國之富而守掌有人出納有案奏報有數侵欺有罰誰得而用之孰得

而那移借貸伏望皇上念邊方多事軍餉關係甚重乞敕戶部查議合無仍復舊規盡革新議今後遇有裝載鹽觔前往廣西湖廣江西等處行鹽地方發賣者經過梧州南雄韶州等處聽臣行令各該盤鹽委官仍照遠年行定舊規每官鹽一引許帶餘鹽六引正鹽一引免其納銀餘鹽每引納銀一錢五分外夾帶多鹽之數許令自首每引納銀二錢五分專備用兵糴糧賞功等項支用自首數

外仍有夾帶隱瞞多餘不盡者各該盤鹽委官盡數盤出沒官犯人照例問發充軍各該盤鹽委官通同受囑容隱不舉事發俱問擬枉法贓罪一體照例充軍仍乞著為定規永遠遵守司其事者毋因一言而輒為變更行其事者毋執私見而擅為改亂如此私鹽之禁猶存奸貪之罰有在倉庫自充軍餉自足逐年用兵行事而供應自無闕乏之憂矣

論征安南疏

張岳

臣伏覩皇子誕生渙頒詔命內外臣民莫不覃敷
惟安南以久不入貢詔使臨遣為之停止下外廷
集議咸謂罪當討無赦陛下寬仁惻怛不忍遽動
甲兵特詔使者馳入其國究問緣由臣待罪邊疆
不能宣達朝廷威德使雕題君長慕義向方奔效
職貢至於上軫聖慮萬里遣使死有餘罪臣竊聞
安南自正德十一年內國王黎暲為逆臣陳暠與

其子陳昇所弑國人立調弟黎諲主國事以兵逐
陳暲父子奔據其國諒山府黎諲立七年又為權
臣莫登庸所逼出居其國清華府登庸立諲幼弟
黎慮相之既又弑慮而自立國內分裂日尋干戈
無暇請貢此皆徃歲傳聞及其國諒山長慶等府
牒報之言其間曲折及近日事情雖不能詳知然
其久爽貢期大抵由此非真負封豕之勢敢於阻
兵拒險以抗上國之命而不貢者也自古蠻夷惟

逆命則誅若其國不能通貢似不足以勞敵中國
今用兵之聲先已傳布使者行勘未復誠恐生事
樂禍之臣不能仰窺陛下所以遣使行勘之本意
迎合附會謀動兵戈臣不暇遠引請以目前義理
事勢反覆詰之夫欲興兵必以黎氏為辭為之討
其亂賊也為區區南交勞師萬里之外討其賊而
定之位非中國長策其不可一也不定黎氏而因
以取之是乘人危難而利其所有五霸稍知義者

不屑為也而謂聖明為之乎其不可二也萬一勝
不可必交人操長技毒弩乘高截險以邀我師則
禍敗孰當之乎其不可三也今兩廣困敵猺獞屯
結官軍僅足備守所恃以調發者狼兵然諸州土
官及湖廣勾刀手連年疲於征調內懷讐怨若復
驅以遠征深入數千里之險進有難必之敵退無
旋反之期狼顧兩端莫堅關志南交暑濕易生疾
疫萬一師老財匱猺獞乘虛而起安南事未可必

兩廣破敗可以立俟其不可四也近日為大工役
府州縣無礙銀兩盡起發赴部梧州軍餉亦因鹽
法壅滯課額虧損每年敷給諸軍剩積無多兵興
十萬日費千金永樂中用八十萬人入交今就折
半言之亦當有四十萬人屯食兩廣飛芻輓粟約
以二石致一石何處措備其不可五也天下承平
久矣人不知兵兵不習戰將帥皆膏粱子弟少經
行陣而縉紳之喜談兵者類皆趙括房琯之流平

居為大言爾蓋深於兵者必不談兵其掇拾古人糟粕以談者多妄也欲舉大事而使膏粱主兵躁妄之士得成其謀不待兩兵相交而不勝之機先見矣其不可六也此六不可者臣特粗舉其端耳至於天下大勢其財用盈虛兵馬強弱民情休戚蓋有非臣職事所及而不敢究言者臣愚以為安南縱有可誅之罪猶當重為民命愛惜審酌輕重於當用兵之中求所可不必用者以全民生以養

元氣今其久不入貢之情只是如此以義理事勢
反覆推之用兵一事臣愚切以為不可天下大器
也安之甚難無故而動搖之臣中夜以思不寒自
慄伏望陛下上承上天仁愛之心遠思皇祖不祥
之訓待行勸使者復命乞下廷臣將安南事勢反
覆熟議如黎氏尚存力能入貢則許之入貢如果
內難未定則且申敕邊臣謹固疆場禁戢奸宄毋
得妄生事端致有驚駭搖動人心待安南亂定應

否入貢另行奏請定奪此於國家事體初未有損
而生靈得免於兵革之禍所全活者多矣臣邊吏
也遇此大征義當擐甲執戈躬率先所部以死効
命乃其職分顧不度分量輕肆瞽言干撓廷議避
事偷安罪當萬死然臣非敢愛死也恐死而無益
是以冒昧為陛下陳之伏冀曲垂裁察

報柳州捷音疏

張岳

臣案查先准兵部咨為巡按廣西監察御史陳宗

夔題前事命會同總兵官陳圭督同副總兵程鑒
并於三司中選委才力超卓二三人責令專任以
事完為期并合用兵糧議處停當具由奏聞一面
約期進兵凡軍中一應機宜俱聽相機行事仍咨
都察院轉行新代巡按廣西監察御史馮彬隨將
有功有罪人員分別具奏等因欽遵備咨到臣已
經行該守巡兵備會同叅將官督同守備府衛并
地方人員備查為惡村分首從賊徒分別哨道合

用漢達土兵各若干細開畫圖貼說并一應軍需等項條具報奪隨據分守右江道右叅政鄭綱整飭右江兵備兼分巡道副使魏良輔暫代分守柳慶等處地方原任左叅將孫繼武會呈奉臣等案驗前事依奉會同鎮守廣西地方副總兵程鑒廣西布政司掌印左布政使李香按察司署印僉事魏一恭都司掌印都指揮周乾議得右江所屬柳慶等府近年以來盜賊充斥人民逃散柳州一府

所屬十二州縣被害尤甚中間馬平來賓等縣里
隆北五等處更為酷烈其巢穴窠深山崗險阻北
通古田永福南通淶里八寨東接藤峽諸江西連
湖貴二境最近而融縣洛容柳城朝發夕至稍遠
而龍哈忻城莫旺此逐彼移其餘旁溪曲徑高壘
深居蓋不啻狐兔之三窟而已而里隆一處魚窩
等巢險峻尤極控引長江有同天塹迥臨絕壁如
守雄關乃柳慶二府之與區西南一方之劇盜盤

據山川豺虎之心益橫因循歲月地方之禍彌深
屢經建議未見施行若非大調兵馬廣集糧餉多
分哨道遠布防禦申嚴號令明信賞罰其何以收
萬全之功除積年之患哉今將府縣查過應勦首
從賊徒名數村分并哨道防守把截去處與夫合
用官軍兵款糧餉船隻等項逐一會同詳議畫圖
貼說備開條件呈報到臣臣等遵照節奉欽依事
理會差官舍分投齎執令旗令牌督調南丹州土

官男莫惟武東蘭州土官男韋起雲那地州土官
男羅廷鳳各目兵并左右兩江各衛所府州縣馬
步官軍打手壯欵人等齊集將各官繳到畫圖貼
說應分哨道書冊分為中左右三大哨俱差官齋
執令旗令牌督押尅定嘉靖二十四年九月初七
日寅時一齊抵巢按圖撲勦其餘為惡村分應該
勦殺儘兵力所及相機行事隨據中左二哨監督
右叅政鄭綱左叅議趙崇信呈稱五都諸寨賊徒

勢益悍猾屯結寨上兵力不敷所圍有限呈乞再
調別處土兵一二萬前來分布三哨以收全功臣
等看得前賊堅結魚窩等寨恃險拒敵未易攻克
隨將勦平廣東封川地方班師自兵於內摘取鎮
安府土官男岑真實精兵三千名田州土官男岑
芝精兵五千名向武州土官男黃仲金精兵三千
名東莞縣銃手五十名及漢達官軍打手人等行
委廣東都司新任都指揮劉海廣東布政司分守

嶺西道右叅政張烜總領隨同臣於十一月十五
日前到柳州駐劄督催功次陸續獲功解報臣等
又看得各處巢賊將次削平惟有魚窩馬鞍龍船
等寨勢極高險拔地數十丈弓箭火銃俱不能達
上有窩凹各賊歲有積聚以防官軍據高臨下畧
石如雨從古攻打未曾克破必須申飭各哨為久
困之計設法攻打恐日久人情懈弛又行委新任
鎮守廣西副總兵程鑒前去總理統督三哨并據

原委左哨監督左叅議趙崇信呈報丁憂去訖隨
改委中哨監督右叅政鄭綱兼管左哨監督臣等
於嘉靖二十五年四月初八日移鎮柳城縣親自
臨督仍將各領哨官以軍法處治鎖項勒限責令
攻打據副總兵程鑒監統等官右叅政鄭綱等稟
於本月初八二十等日購募敢死目兵黑夜藏火
毬用繩梯鈎搭絕壁偷上魚窩馬鞍二寨奪其閘
門投火毬燒其茅房賊衆驚亂各兵魚貫而登斬

獲數多其被火燒死及墜落懸崖不計其數并俘
獲賊屬人口奪獲器械等項解報前來今據前因
臣會同鎮守兩廣地方總兵官征蠻將軍太子太
保平江伯陳圭議照廣西柳州府馬平柳城融縣
等縣五都里隆上油石龍鷺頸等巢賊首韋金田
韋金秀韋明濂覃朝鮮藍扶威韋扶曠韋張容韋
朝龍等各據險巢朋黨為患聲勢相通其中五都
魚窩馬鞍等巢自洪武初年以來不入版圖尤為

險惡諸蠻所視以為向背蓋自正德二年徵兵大
舉斬獲首級雖多然而魚窩等巢攻圍數月竟未
盡克遂且招撫是以兵散之後餘黨復布山谷頃
年以來根蔓延引占據慶遠水陸二路敵殺官軍
攻劫縣庫殺戮鄉村每殺一村則一村田土盡被
包占積歲蠶食各縣僅存附郭數里其餘大抵漫
為盜區又恃其險阻徂於招安謂官軍不能持久
從來征勦終歸於招故敢據險拒敵以老我師狡

猾兇狠人神共怒臣等仰遵兵部題奉欽依調集官兵親臨調度攻勦以九月初進兵收其木稼兵有餘食決意持久以絕後患其團結土寨者會兵圍困遯投別巢者黏蹤窮追誓以必破此賊乃肯班師是以人無還心進皆死戰賊勢日蹙險遠巢寨並皆摧滅已將各哨報到擒斬首從賊人賊級共四千零八十四名顆轉發紀功官驗實通行造報其首惡韋金秀覃朝鮮韋明濂藍扶威等明正

典刑餘威所震羣蠻膽落而馬平縣三都四都來
賓縣北五賓州龍哈八寨并象州五宣洛容等處
以北及乎古田之境其魁渠皆自投軍門願編立
里甲輸納稅糧同於百姓原被賊殺占額徵糧米
今清出一千三百二十六石有奇經報在官聽撫
造冊給帖者已有二萬零六百六十三名送出原
日行兇盜甲鎗刀弩箭等項共二千八百一十七
件馬三百五十五匹其班師之後陸續聽招者尚

未開報各被賊逼逐良民皆行令有司安插復業
田土或仍舊或招人耕種蠻禍消除地方寧息是
皆仰仗我皇上之聖德同天春生秋肅並行以成
歲功臣等奉揚天威遵奉廟謨致此克捷非犬馬
之力所能及也及照賞以示勸罰以示威軍旅之
中所繫尤切臣等所以能鼓舞羣心奮勇趨事者
亦惟宣國家賞罰之典示以信必之令使之有所
畏而知勸爾除將調征兩廣漢達官軍土官目兵

打手人等量行犒賞掣放休息其已聽撫夷僮行
令所司加意存恤未招者備行守巡官遵照臣等
原行條約逐一撫處停當安插復業及摘發泗城
東蘭南丹那地等州目兵五十名行令叅將戚振
管領在於柳州融縣來賓千蔓古零等處立營防
守俟數月之後事體即定人心稍安即行掣放臣
等於本年五月二十四日班師回還梧州總府控
制地方其餘有功獲功并陣亡傷故被傷官軍目

兵人等照例聽巡按廣西監察御史通查明白覈實造冊另行奏繳

報連山賀縣捷音疏

張岳

照得先因廣西賀縣弓山礮石黃崗等巢積年賊首倪仲亮李三弟等廣東連山縣黃南梅水大曲等巢積年賊首李金石住等各結黨嘯聚相煽為亂流劫鄉村殺擄人財奪占田土民不寧居貽患三十餘年節據連賀二縣被害排年軍民黃昂黎

得春等連詞具告請兵征勅已該臣會同鎮守兩
廣地方總兵官征蠻將軍平江伯陳圭議得前賊
積惡已盈流毒甚慘屢撫屢叛勢在必征將調到
廣西鎮安思明田州南丹東蘭那地向武都康泗
城歸順上林等府州司縣土官目兵并兩廣漢達
官軍民壯打手人等分為二大哨一哨賀縣委鎮
守廣西地方副總兵官沈希儀統督廣西按察司
僉事俞則全監督指揮李琮孫文繡陳棟鄒繼芳

卜爵等共兵五萬九千五百七十七員名進勦弓
山礮石黃崗等巢首從賊徒一哨連山縣委廣東
布政司左叅議朱憲章監督廣東都司署都指揮
僉事梁希孔統督指揮莫如爵黑孟陽李涇王照
共兵二萬零七百九十員名進勦黃南梅水大曲
等巢首從賊徒及行湖廣巡撫衙門督行柳桂衡
永上湖南等道兵備分守分巡守備等官各調集
官兵鄉夫委謀勇指揮千百戶等官管領把截尅

定嘉靖二十七年正月十四日寅時一齊抵巢按
圖撲勦應與湖廣官兵夾攻者約會夾攻仍委廣
西布政司左叅議朱道瀾總理賀縣哨廣東布政
司監督左叅議朱憲章兼管總理連山縣哨各軍
前糧餉會本具題外續於本月二十一日據賀縣
哨監統副總兵沈希儀僉事俞則全呈報并據連
山哨監統左叅議朱憲章都指揮梁希孔呈報及
據湖廣按察司整飭柳桂衡永兵備兼分巡上湖

南道副使潘子正呈稱各前來臣等查得連山賀
縣二哨官兵通共擒斬首從賊人賊級三千零一
十九名顆俘獲賊屬二百八十六名口奪回被擄
男婦四名口奪獲牛馬二百七十九頭匹器械一
千零五十八件俱經巡按御史蕭世延楊以誠原
委紀功廣西按察司副使沈宏廣東按察司副使
黃光昇閱驗審勘明白獲功官軍目兵各照賞格
給賞陣亡被傷者給與銀兩以為營葬及湯藥之

資生擒內有詞者監候另議情真無寃者遵照兵部奏准嚴法令以靖地方事例押赴市曹處決器械貯庫被擄人口給親完聚俘賊屬與牛馬俱變賣價銀入官其湖廣官兵所獲首從賊人賊級賊屬等項備行該道俱徑呈彼處按撫衙門定奪委官紀驗施行外臣會同鎮守兩廣地方總兵官征蠻將軍太保兼太子太保平江伯陳圭議照廣西賀縣接連廣東連山縣地方密邇湖廣江華等縣

崖尚深險林箐叢密各賊盤據負固肆兇東攻則西遯西攻則東遯急之走入險阻緩之復糾聚出沒正德年間雖曾具奏征勦賀縣特以一面進兵不曾會合三省致使殘黨旋復嘯聚如賊首倪仲亮鄧良朝梁榮李金石住等合衆數千僭稱名號焚掠村寨占據田土逼近關廂禍延三省劫掠得志黨附益多各處無賴姦民投入夥中導之遠劫至於德慶開建等州縣亦被其害若不急為勦滅

誠恐後來愈熾深為未便臣等動調官軍土兵行
委副總兵三司等官統領進勦幸致克捷即今地
方之患已除神人之憤獲伸舊民復業安枕而卧
是皆仰仗皇上聖武宏敷天威遠振故能兵不畱
行賊無堅寨豈臣等犬馬微力所能強致伏惟皇
上軫念邊方用武之地敕下該部查議將前項有
功官員議擬上請量予陞賞庶人心激厲而將來
任事益加奮勉其餘有功獲功并陣亡傷故被傷

官軍目兵人等照例聽各該巡按御史通查覈實
造冊奉繳

三大政論嚴嵩疏

張 紳

竊見大學士嵩貴則極人臣富則甲天下子為侍
郎孫為錦衣中書賓客滿朝班親姻盡朱紫犬馬
尚知報主乃嵩則不然臣試以邊方財賦人才三
大政言之國家所恃為屏翰者邊鎮也自嵩輔政
文武將吏率由賄進其始不核名實但通關節即

與除授其後不論功次但勤問遺即被超遷托名
修邊建堡覆軍者得廕子濫殺者得轉官公肆詆
欺交相販鬻而祖宗二百年防邊之計盡廢壞矣
戶部發邊餉本以贍軍自嵩輔政朝出度支之門
暮入奸臣之府輸邊者四饋嵩者六臣每過長安
街見嵩門下無非邊鎮使人未見其父先饋其子
未見其子先饋家人私藏充溢半屬軍儲邊卒凍
餒不保朝夕而祖宗二百年養之軍盡耗弱矣

邊防既隳邊儲既虛使人才足供陛下用猶不足
憂也嵩貌茂名器私營囊橐世蕃以狙獍資倚父
虎狼之勢招權罔利獸攫烏鈔無耻之徒絡繹奔
走靡然成風有如狂瘍而祖宗二百年培養之人
才盡敗壞矣夫嵩險足以傾人詐足以惑世辨足
以亂政才足以濟奸附己者加諸膝異己者墜之
淵箝天下口使不敢言而其惡日以恣此忠義之
士所以搯腕憤激懷深長之憂者也陛下誠賜斥

謹以快衆憤則緣邊將士不戰而氣自倍百司庶
府不令而政自新矣

酌議事宜以安民庶以固地方疏 吳文華

一割屬縣以全府治據右江兵巡道議稱思恩府
原屬土州正統間土官岑瑛有功陞為府尋改為
軍民府添設流官佐貳弘治末年瑛孫濬叛討滅
之改流官知府設鳳化縣隸焉嘉靖初年土酋王
受作亂新建伯王守仁撫平之始遷府治於荒田

割南寧府武緣止戈一二圖為之編戶裂思恩舊
治為九土司以分散其黨乃數十年來種類日悍
蔑視漢官亡論軍符不以時赴即桀驁未易宰制
譬之畜養驕抗孽奴緩急未易得力且漸成尾大
不掉之憂所以然者該府無衛所少編民一旅一
卒皆出自九司其操縱之勢原未有恃也嘗考新
建伯王守仁奏議鳳化縣移於三里及割柳州府
屬上林縣以隸思恩蓋三里為八寨咽喉上林為

八寨門戶欲壯思恩就近彈壓故耳旋以反側未
定議寢不果職謂此議實思恩萬世之利在今日
猶所當行者上林距柳州五百餘里距思恩五六
十里而近割屬思恩府豈惟思恩有所資輔即上
林縣之民亦大稱便及查武緣縣止戈四五圖地
方與原割止戈二圖交攙錯落距思恩亦止二三
十里若去南寧其地既遠民又愚頑往往不聽勾
攝連年逋負無怪其然然則割此二圖編戶思恩

而又以上林縣屬焉豈惟民之順即思恩之權日重九司之勢自輕矣該臣會同總督兩廣兵部左侍郎凌雲翼巡按廣西監察御史陸萬鍾看得思恩府自改土為流分立九司并割武緣止戈一二圖附屬迄今幾六十年較之當時頗為寧帖惟是郡城孤懸別無一州一縣以資保障而環城以居盡是武緣之民其去南寧在三百里之外內永寧二里膺墟舊墟諸處民素慄悍甚有勾引八寨流

刳者徒使該府束手莫敢誰何夫以環城之衆近在几席顧屬之他人緩急不得其用而頑梗之徒外煽內訐又以非其統轄置而不敢問此所謂桀驁也且該府守服役皆取給九司而九司近日頭日日悍且成尾大則二里之民已不足恃該府將何以善其後哉今議欲上林縣并武緣縣止戈四五圖割屬思庶成府治但上林係賓州屬邑先年已經停罷不必議割查得南寧府屬有三州三

縣土司不與焉若以武緣一縣割屬思恩止戈二
圖仍併於武緣則南寧於近年增一新寧州去一
縣屬於郡治固無所損而思恩全得此縣則環城
之衆有臂指聯屬之情九司之悍免恃強跋扈之
憂八寨之雄有畏威懾服之勢南柳兩郡有藩籬
唇齒之固而該府經制既備體勢日尊屹然為右
江一巨鎮矣一轉移間而為百年可久之計非有
更張拂民之舉動也兵部覆議查得思恩府自弘

治年間岑濬叛後改土為流正德初又設鳳化一
縣隸之然無縣治徒寄空官至嘉靖七年該新建
伯王守仁因土酋王受作亂撫平之始議改築府
治於荒田既係武緣止戈一二圖之地就割其民
為之編戶以思恩舊治裂為九土巡檢司而統於
府又議改設鳳化縣治於三里而併割上林以屬
思恩續該都御史林富覆議改築思恩真保治安
民勢不容已之事若鳳化縣徒寄虛名無益事體

應即裁革三里之地本屬上林上林本屬賓州各
仍其舊本部依擬題奉旨遵行訖數十年來事勢
相安但九司之衆多係餘孽漸爾驕黠而該府編
民甚少緩急難恃况環府而居者大半武緣之民
不服驅使而南寧往歲又增一新寧州是以諸臣
目擊其地思為可久之計欲以武緣一縣割而屬
之蓋使府縣相依得彈壓之體而土司之黨益斂
懾其心在南寧似無所損而思恩則有所益也既

經督撫等官會議僉同相應依擬恭候命下本部
移咨兩廣總督兵部左侍郎凌雲翼巡撫廣西右
副都御史吳文華及咨都察院轉行巡按廣西監
察御史陸萬鍾即行該司道府等官將思恩止戈
一二圖仍歸併武緣縣通將武緣縣一縣改屬思
恩府該縣人民錢糧等項悉聽府官統轄其九土
巡檢司照舊并屬該府管轄一應差事相兼處辦
從宜區畫施行

諫封倭疏

曹學程

題為倭情已變封事宜停懇乞宸斷亟殛賊臣止冊使以存國體以安宗社事邇者封事已壞發言盈廷走宗城縛惟敬戮從臣遼陽偵報不虛冊使揭帖踵至矣頃者聖旨允戴士衡周孔教疏着令九卿科道會議戰守機宜毋貽後悔是皇上已洞見封事之非而決之衆論也又奉聖旨選風力科臣一員與楊方亨冊封是皇上又疑惑於楊方亨

之揭謂封事可成也詎知石星方亨同條共貫轉
相附和詞不足憑且三臣共使異域宗城出亡惟
敬就縛倭奴何德方亨獨晏然無事哉方亨且生
死未卜乃請添冊使禁治流言即三尺童子亦知
其詐非本兵矯誣以欺陛下必狡倭設計以陷中
朝望陛下詳察而熟計之也本兵謂遼東撫按之
報視為流言今冊使李宗城之揭將不足信乎倭
情已變猶云未變封事已敗猶云可成賊臣誣國

一至於此吾誰欺欺天乎今據李宗城揭稱關白
執沈惟敬要求七事原不為封雖不顯言大都有
據倭夷狡詐異常貪饕無厭得封不已必求入貢
入貢不已必求互市互市不已必求和婚和婚不
已必求朝鮮納賦納賦不已必求分割尚義割地
不已必求捲席朝鮮渡鴨綠而薊遼危矣倭情吐
露不待今日自宋應昌經畧之始李如松入援之
時沈惟敬使倭之日已與插盟即不盡許七事業

已經諾一二顧養謙封貢一疏李如松與沈惟敬
一扎情形破敗不在於惟敬就縛之日已發覺於
朱龍光未死之先不然朝鮮日本一葦可航悠悠
年餘何難一決此其故不難於一封而難於七事
不辯可知也夫堂堂天朝反為倭制皇皇天使竟
作虜囚愈要挾則愈彌縫愈昭露則愈箝制此忠
義之士日夕拊心飲血相與罷封事決戰守斷奸
臣首以謝天下乃悞國賊臣內外深結始終執拗

甘心媚倭陛下獨不鑒南宋之事乎秦檜史彌遠
力主和議終移宋祚前車已覆可為寒心封事之
非舉朝以為不可宗城已悞豈容再悞科臣攻擊
即以科臣徃封是亦賊臣籠絡深計成則功歸於
已不成委咎科臣是以科臣寧甘鼎鑊不敢奉詔
夫人臣既委質為臣東西南北惟其所使死且不
避何敢避難為不忠哉顧他日事成猶可結局了
事萬一不濟甚重執以為質封外要求即科臣仗

蘇武之節效真卿之義必不為宗城抱頭鼠竄以
貽國羞大損國威喪氣狡夷貽臭萬年臣竊悲之
為今日計科臣往勘則可往封則不可也若云可
成則齎冊渡海不成則持節還朝視君命如兒戲
等冊使為說客辱國欺君罪莫大矣事成功有所
歸不成責亦難諉天語煌煌著如皎日今日封事
成耶敗耶言官持議驗耶否耶陛下以平章軍國
托元輔以參贊機務倚樞臣天下事非一家私奈

何偏執星狼狼自用臯碌碌依阿星曰關白可封
臯亦曰關白可封星曰再遣科臣臯亦曰再遣科
臣今日封倭之使即昔日排己之人彥博之薦唐
介當不若是昔魏學曾亦以任事竒功未見陛下
嚴譴學曾而寧夏卒奏蕩平今東事潰裂元輔樞
臣不得辭其責矣大臣去畱冊使行止社稷安危
係此一舉願陛下熟察斧斷天下幸甚

廣西通志卷一百一

欽定四庫全書

史部

廣西通志卷一百三

詳校官給事中臣鄧文洋

檢討臣德生覆勘

總校官進士臣朱 鈐

校對官編修臣盧 遂

謄錄監生臣王元愷

欽定四庫全書

廣西通志卷一百二

藝文

歷朝

狀

代裴中丞奏邕管黃家賊事宜狀

唐柳宗元

邕管奏事官嚴訓過稱押衙譚叔向等與黃家賊
五千餘人謀為翻動雖已誅斬猶未清寧臣當時

差本道同十將試光祿卿雷遠至邕管界首賓州
以來刺探事宜兼為聲援昨得雷遠十四日狀并
嚴訓狀報同到其黃家賊並已退散各歸崗穴訖
伏以鼠竊狗偷非足為患陛下威靈遠被神化旁
行遂使姦猾之謀先期而自露回邪之黨不戮而
盡滅伏恐飛章已達吉語未聞上軫天心猶煩廟
算臣謬居方鎮忝接疆界不敢不奏

西原尚黃賊未平狀

韓愈

臣去年貶嶺外刺史其州雖與黃家賊不相隣接然見往來過客并諳知嶺外事人所說至精至熟其賊並是夷獠亦無城郭可居依山傍險自稱尙主衣服言語都不似人尋常亦各營生急則屯聚相保比緣邕管經畧使多不得人德既不能綏懷威又不能臨制侵欺虜縛以致怨恨蠻夷之性易動難安遂至攻劫州縣侵暴平人或復私讐或貪小利或聚或散終亦不能為事近者征討本起於

裴行立陽旻此兩人者本無遠慮深謀意在邀功
求賞亦緣見賊未屯聚之時將謂單弱立可摧破
爭獻謀計惟恐後時朝廷信之遂允其請自用兵
已來已經二年前後所奏殺獲計不下一二萬人
儻皆非虛賊已尋盡至今賊猶依舊足明欺罔朝
廷邕容兩管因此凋弊殺傷疾患十室九空百姓
怨嗟如出一口陽旻行立相繼身亡實由自邀功
賞造作兵端人神共嫉以致殃咎陽旻行立事既

已往今所用嚴公素者亦非撫御之才不能別立規模依前還請攻討如此不已臣恐嶺南一道未有寧息之時昨者併邕容兩管為一道深合事宜然邕州與賊逼近容州則甚懸隔其經畧使若置在邕州與賊隔江對岸兵鎮所處物力必全一則不敢輕有侵犯一則易為遂便控制今置在容州則邕州兵馬必少賊見勢弱易生奸心伏請移經畧使於邕州其容州但置刺史實為至便比者所

發諸道南討兵馬例皆不諳山川不伏水土遠鄉
羈旅疾疫殺傷臣自南來見說江西所發共四百
人曾未一年其所存者數不滿百岳鄂所發部三
百人其所存者四分纔一續添續死每發倍難若
令於邕容側近召募添置千人便割諸道見供行
營人數糧賜均融充給所費既不增加而兵士又
皆便習長有守備不同客軍守則有威攻則有利
况自南討已來賊徒亦甚傷損察其情理厭苦必

深大抵嶺南人稀地廣賊之所處又更荒僻假如
盡殺其人盡得其地在於國計不為有益容貸羈
縻亦未虧損朝廷事勢以臣之愚若因改元大慶
赦其罪戾遣一郎官御史親往宣諭必望風降伏
謹呼聽命仍為擇選有材用威信諳嶺南事者為
經畧使處理得宜自然永無侵叛之事

奏桂管常平義倉狀

李渤

臣伏詳敕文本救荒歉忽有危切貴及其時當州

去京往來萬里奏回方給豈及饑人臣請所管忽
遇災荒量事賑貸訖續分析聞奏庶使遠人速沾
聖澤遐流臣之所管僻在嶺外迫以山賊人尤難
理若令數改必困蠹食常平義倉本救災害向為
歉沴擢臣處之方鎮臣宜竭力上答皇明伏乞聖
恩允臣所奏庶使皇靈遠被獷俗知恩

論清舜廟狀

李渤

右臣謹按地圖舜陵在九疑之山舜廟在太陽之

溪舜陵古老已失太陽溪今不知處秦漢以來置
廟山下年代寔遠祠宇不存每有詔書令州縣致
祭奠酬荒野恭命而已豈有盛德大業百王師表
沒投荒裔陵廟皆無臣謹遵舊制於州西山上已
立廟訖特乞天恩許蠲免近廟三五家令歲時拂
灑示為恒式豈獨表聖人至德及於萬代實欲彰
陛下元澤被於無窮謹錄奏聞

薦昭州刺史張慙狀

令狐楚

右臣伏準貞元六年十一月八日勅旨自今以後
諸州刺史縣令已肆考如理術尤異實効可稱考
滿日委觀察使錄事跡以聞特加獎擢者前件官
守文惟謹持法甚精清廉有餘貞固無比臣伏見
嶺南風俗惰嬾苟避征徭易成逋竄張憐憂人若
已理郡如家勸課農桑置立保社移風為敦厚之
境徵賦無慘急之名周旋六年其道一致臣猥司
廉察忝守方隅以所見聞恐須甄錄

乞令韓世忠不拘路分前去廣東招捕曹成奏狀

宋
李綱

據廣南東路安撫使林適劄子節次契勘曹成賊
馬三月二十九日自道州侵犯臨賀遣兵四出見
屯兩路要害去處本路兵馬單少素不練習西路
尚有尙丁刀弩手可用至如東路搶杖手名籍雖
存其實農夫豈可出戰除已逐急發兵控守關阨
然賀州勢在上流南入連英東下封康不數日便

至番禺今來封連探報事愈危急准樞密院劄子
差高舉一頭項兵應援二廣並未見入界除已統
率人兵旦夕就道至封康以來防遏外乞撥高舉
人兵星夜前來應援庶幾保全二廣又據廣南東
路轉運判官章傑四月十四日申探報曹成賊馬
分作三頭項透入賀州富川縣殺人放火劫虜人
民賊勢浩瀚乞催發高舉人馬兼程前來會合捉
殺免至奔衝又據轉運判官章傑申探報曹成賊

馬四月初三日乘牌船過水東入賀州放火燒本
州敵樓戰棚及居民屋宇等賀州知州及本州官
盡出州城下水前去乞速差兵前來救援又據轉
運判官章傑四月十六日申據廣州懷集縣申四
月初一日曹成賊馬侵犯縣界令佐等將帶弓級
保甲槍手等前去迎敵賊衆浩瀚勢力不加遂致
潰散其賊兵直衝突占據本縣廣州事勢危急乞
催發高舉人兵疾速前來應援者

右臣所據廣南東路安撫使林適轉運判官章傑
公文探報曹成賊馬次第備錄在前契勘臣昨准
尚書省劄子除臣荆湖廣南路安撫使於韓世忠
下撥高舉一項兵馬八千餘人聽臣節制續准指
揮改差任仕安將帶所部軍馬隨逐前去之任其
任仕安下人兵元管二千八百餘人又為福建路
安撫司陳乞統領官陳照馬準下一千五百餘人
存留福建其餘止有一千三百餘人委是單少臣

以見具奏辭免恩命未敢申陳今蒙恩差入內內
侍省西頭供奉官于蓋前來降賜教遣就道臣仰
迫天威已祇受告命擇日開司朝夕啟行今據廣
東路官司申報曹成賊馬已破賀州占據懷集縣
係廣州屬縣事勢委是危急帥臣林適稱親自率
兵前去封康州防抵切慮未足倚仗其廣州繁富
號為東南都會雖有可守城池若帥臣已去誰與
固守實為可慮臣方受命之初道里遼遠又所得

任仕安兵纔十餘人難以分撥應援雖已遵依近
降指揮許依江東路安撫大使畫一差兵二萬人
旋行踏逐方具奏請聽候指揮無由目下便得齊
集深慮應援有失機會曹成賊馬為二廣之患滋
大萬一廣州或致失守自餘州郡多無城池皆須
望風奔潰其害有不可勝言者臣輒有愚慮仰瀆
天聽臣竊見福建江西荆湖宣撫副使韓世忠行
軍整肅忠勇有謀曹成劇賊十餘萬衆除老弱脅

從婦女外能戰兵尚三萬餘人使其餘將士當之
未必能有濟欲制此賊或招或捕非世忠不可今
世忠統兵已到虔吉筠袁間深恐拘礙路分止在
荆湖不敢前去廣南則曹成為二廣之患其勢未
艾伏望聖慈矜憐廣南兩路生靈之衆在今日為
朝廷腹心之地不可不早加料理特降睿旨令世
忠不拘路分量留人馬照應荆湖外盡將所部取
便道前去應援廣東措置曹成一則軍馬已集可

以目前使喚二則道里已近可以指期而至臣愚竊謂朝廷今日應援廣東之策無以加此又廣東素號瘠薄應付大軍錢糧必至闕乏世忠既行福建江西荆湖宣撫司將剗刷到錢糧可以通融應付此又軍期所須之大者如何聖意乞作朝廷措置用金字牌入遞付世忠施行臣已具奏遵凜聖旨許依江東安撫大使畫一指揮踏逐人兵如蒙朝廷應付亦乞用金字牌降下敕劄庶幾早得齊

集可以與世忠聲援相接二廣早見平定

小帖子

契勘福建江西荆湖宣撫司與荆湖廣南宣撫司
兩司不相節制如蒙聖慈從臣所請令韓世忠前
去廣東招捕曹成乞降指揮今與臣關報事宜同
共措置庶幾不相違戾有所協濟伏候敕旨
乞令韓世忠相度入廣西招捕曹成奏狀

李綱

今月二十七日准尚書省劄子江南西路安撫大使李回奏繳到岳飛狀准江南西路安撫大使司牒三月二十二日准樞密院三月四日劄子奉聖旨令岳飛到袁州更切斟量賊勢如賊兵衆且於袁州駐劄候宣撫司人馬到同共進兵如曹成已受招安起發赴行在即與馬友會合同共勦殺劉忠訖續往潭州無致稍失機會却致賊兵破壞二廣飛一行軍馬已到衡州茶陵縣不住承准郴衡

州桂陽監等處關報及飛亦差人體探得曹成已發人馬取三月十九日起發往全永州侵犯廣西界分并前軍人馬往賀州路前去其曹成中軍見在道州未有的實起發月日見不住放人四向虜掠殺人放火似此顯見曹成未肯便赴行在意欲侵犯二廣作過今准前項公牒奉聖旨指揮緣一行官兵已過袁州地里稍遠兼續於四月初三日准荆湖東路提刑司關報探得曹成賊馬已起離

道州前去廣西飛除已差人體探子細外今已進
發住郴州桂陽監已來駐泊如曹成不赴行在及
未入廣西飛便行措置進兵掩殺若曹成已入廣
界不審令飛一行軍馬如何施行已具錄奏聞伏
望聖慈特降睿旨付飛責憑遵依施行

右勘會近據岳飛申到前項事理勘會曹成一行
雖有五萬餘衆其少壯之人止僅二三萬四月二
十六日已奉聖旨令岳飛更切探伺如曹成委是

不肯赴行在已侵入廣南地分即統率諸頭項軍
馬取徑路併力追襲掩擊務在從長措置保護二
廣無致稍失事機破壞廣南州縣仍令廣南東西
路帥臣依已降指揮起發逐路崗丁刀弩手將兵
土軍弓手民兵疾速躬親統率前來界首與岳飛
會合併力夾攻并劄與孟庾韓世忠及臣措置施
行者

右臣近據廣南東路安撫使林通轉運判官章傑

申探報曹成賊馬已破賀州侵犯廣州界分占據
懷集縣廣州事勢危急乞發應援臣已具奏聞竊
見韓世忠治軍嚴整忠勇有謀少見其比乞令不
拘路分統率大兵前去廣東應援措置招捕曹成
免致廣南兩路破壞州縣外今准樞密院劄子備
奉前項聖旨令岳飛更切探伺如曹成已侵入廣
南地分即統率諸頭項軍馬取徑路併力追襲掩
擊務在從長措置保護二廣劄付孟庾韓世忠及

臣疾速措置臣已關送福建江西荆湖宣撫使副
及劄下岳飛恭依聖旨指揮施行訖契勘曹成一
項賊馬最為桀黠外假聽從招納之名內有包藏
窺覷之意占據道州半年有餘侵犯二廣其衆號
稱十萬餘除老弱脅從婦女之外可戰之兵猶有
三萬餘人既為大兵所逼遂有乘虛深入二廣之
計廣西猶有尙丁刀弩手兵將之屬可以控遏廣
東兵力實為單弱難以支吾深慮州縣望風奔潰

為害不細今雖已降指揮令岳飛統率諸頭項人馬追襲掩擊竊慮岳飛所率兵數不多錢糧闕乏未必能濟非得韓世忠統率大兵前去措置應援及將福建江西荆湖宣撫司剋剋到諸路錢糧通融應付深恐未能早見招捕了當兼契勘曹成本係荆湖盜賊只緣大兵所逼遂犯廣南若拘以路分謂目今作過不係荆湖地分即是以鄰國為壑恐非朝廷銷弭內患之意臣今欲乞自朝廷降措

揮令世忠相度如大兵目今已在湖南及筠袁間
即由全永入廣西路自桂府順流以趨廣州如大
兵目今在虔吉間即由南安南雄英韶路順流以
趨廣州可以遏賊之衝令岳飛統率軍馬由道賀
追襲其後臣如蒙朝廷應付畫一內所踏逐兵勾
抽齊集亦可以由虔吉英韶前去封康循惠間隨
宜措置禦賊奔迸與之協力進討不數月間須見
了當却由便路趨湖南措置其餘盜賊不難平定

伏望聖慈特降睿旨詳酌施行

小帖子

臣契勘廣南西路五十餘州舊號荒遠在今日實
為要地今曹成侵犯若不早加措置招捕了當竊
恐兩路州縣為賊殘破卒難經理兼兩路皆有徭
人谿崗乘勢必須作過廣西與交趾相隣亦恐有
所窺伺道里去朝廷最遠將來兵力難及朝廷不
可不深留意於此伏乞聖察

乞本司自備錢本前去廣西出產鹽地分計置煎
鹽奏狀

李綱

右臣累具奏聞乞於江西路隣州撥米五萬石錢
十萬貫應付本路支用至今未蒙回降指揮蓋緣
本路連年為盜賊蹂踐州縣類皆殘破百姓屢經
科湏物力匱乏難以再行敷配深慮目前闕乏無
以贍給軍兵招捕盜賊及到本路官私空匱皆如
所料雖多方擘畫應付支遣別無可以措置理財

足用之術喋喋仰煩朝廷方當多事之時決難逐
一指準應付竊見廣西逐年煎造海鹽元額都計
二千一百萬觔近年以來失於措置煎造不及四
分之一其餘皆是失陷之數湖南北路見今通行
廣東鈔鹽商賈入納搬運數目不多遂致闕食每
觔價例日漸增長厚利悉歸商賈民間日食貴鹽
見今私販公然行往實難禁止欲乞朝廷特降指
揮許令臣本司自備錢本前去廣西出產海鹽地

分計置煎鹽於二千一百萬觔十分數內只乞二分
分之數計四百二十萬觔本司自備舟船脚力搬
運前來本路出賣庶幾鹽價稍平民不艱食羸餘
之數可以贍養軍兵不致仰煩朝廷應付如朝廷
以爲有侵權貨務之利即乞依廣東鈔鹽體例於
權貨務入納鈔面錢即於鹽法並不相妨委是利
便伏望聖慈特降睿旨詳酌施行

議

慎選交州刺史檢攝長吏議

具薛綜

昔舜帝南巡卒於蒼梧秦置桂林南海象郡然則
四國之內屬也有自來矣趙佗起番禺懷服百粵
之君珠官之南是也漢武帝誅呂嘉開九郡設交
趾刺史以鎮監之山川長遠習俗不齊言語同異
重譯乃通椎結徒跣貫頭左衽長吏之設雖有若
無自斯以來頗徙中國罪人雜居其間稍使學書
粗知言語使驛往來觀見禮化及後錫光爲交趾

任延為九真太守乃教其耕犁使之冠履為設媒
官始知聘娶建立學校導之經義由此以降四百
餘年頗有似類然而土廣人衆阻險毒害易以為
亂難使從治縣官羈縻示令威服田戶之租賦裁
取供辦貴致遠珍名珠香樂象牙犀角瑇瑁珊瑚
琉璃鸚鵡翡翠孔雀奇物充備寶玩不必仰其賦
入以益中國也長吏之選類不精覈漢時法寬多
自放恣故數反違法珠崖之廢起於長吏覩其好

髮髡取為髮及臣所見日南太守南海黃蓋九真
太守儋明毒虐薄曹仍見驅逐明至物故交趾太
守士燮遣兵致討卒不能克又故刺史會稽朱符
多以鄉人虞褒劉彥之徒分作長吏疆賦於民百
姓怨叛山賊並出攻州突郡符走入海流離喪亡
次得南陽張津與荊州牧劉表為隙兵弱敵疆歲
歲興軍諸將厭患去留自在津小檢攝威武不足
為所陵侮遂至殺沒後得零陵賴恭先輩仁謹不

曉時事表又遣長沙吳巨為蒼梧太守巨武夫輕
悍不為恭服所取相怨恨逐出恭求步騭是時津
故將夷廖錢博之徒尚多騭以次鉏治綱紀遠定
會仍召出呂岱既至有士氏之變越車南征平討
之日改置長史章明王綱威加萬里大小承風由
此言之綏邊撫裔實有其人牧伯之任既宜清能
荒流之表禍福尤甚今日交州雖名粗定尚有高
涼宿賊其南海蒼梧鬱林珠官四郡界未綏依作

寇盜專為亡叛逋逃之數若岱不復南新刺史宜
得精密檢攝八郡方畧智計能稍稍以漸能治高
涼者假其威寵借之形勢責其成效庶幾可補復
如但中人近守常法無竒數異術者則羣惡日滋
久遠成害故國之安危在於所任不可不察也竊
懼朝廷忽輕其選故敢竭愚情以廣聖思

鹽法議

宋李茆

廣西鹽法見於已行者曰鈔商興販也曰官自般

賣也然二者利害不可不究且官自般賣舊係本
路轉運司主其事行之既便歲課自足諸州亦無
缺乏之患爰自紹興八年改行鈔法轉運司所得
僅二分不能給諸州歲計至於高折秋苗民被其
害逐年賣鈔所虧之數甚多陛下灼見其弊仍舊
撥還轉運司均與諸州官般官賣盡罷折米招糴
之為民害者止令轉運司歲認息錢三十一萬貫
其為計甚善自當確守此法必為永久之利宜詔

令戶部將廣西官般官賣鹽法申嚴行下常切遵守

復官般官賣法杜絕科抑議

趙伯湯

曩者諫議之臣以官般官賣科敷百姓害及一路於是改行鈔法上以足國下以裕民莫不以為便今六年矣諸郡煎熬益甚民旅困於科抑名曰足國實未嘗足名曰裕民實未嘗裕臣嘗徧訪吏民向者官般官賣之時廣西諸郡誠有科敷百姓去

處然不過產鹽地分所謂高化欽廉雷五州是也
海鄉鹽賤不肯買故有科抑如靜江鬱林宜融柳
象昭賀梧藤邕容橫貴潯賓近裏一十六州去鹽
場遠若非官賣無從得鹽舊時逐州隨宜置鋪出
賣民間食用樂然就買不待科抑自改行鈔法以
來近裏一十六州徒損於官無補於民民食貴鹽
又遭科鹽鈔之苦沿海五州雖名賣鈔其舊賣二
分食鹽元不曾禁戢計戶科擾如故切謂今日之

法正當講究沿海五州利病杜絕科敷不當變近裏一十六州官般官賣之法

答守道留兵防守議

明 王守仁

始觀論議似亦區畫經久之謀徐考成功終亦支吾目前之計蓋用兵之法伐謀為先處蠻之道攻心為上今各徭征勦之後有司即宜誠心撫恤以安其心若不服其心而徒欲久留湖兵多調狼卒憑藉兵力以威劫把持謂為可久之計則亦未矣

殊不知遠來客兵怨憤不肯為用一也供饋之需
稍不滿意求索訾詈將無底極二也僦居民間騷
擾濁亂易生讐隙三也困頓日久資財耗竭適以
自敝四也欲借此以衛民而反為民增一苦欲借
此以防賊而反為吾招一寇其可行乎合行知府
程雲鵬公同指揮周蔭宗及各縣知縣等官親至
已破賊巢各隣近良善村寨以次加厚撫恤給以
告示犒以魚鹽待以誠信敷以德恩諭以朝廷所

以誅勦各賊者為其稔惡不悛若爾等善良守分
村寨我官府何嘗輕動爾等一草一木爾等各宜
益堅向善之心毋為彼所煽惑搖動從而為之推
選衆所信服立為蠻長以連屬之若各賊果能改
惡遷善實心向化今日來投今日即待以良善次
不追既往之惡爾等即可以此意傳告開諭之我
官府亦就實心招安招來量給鹽米為之經紀生
理亦就為之選立蠻長使有統率毋令渙散一面

清查侵占田土開立里甲以息日後之爭禁約良民毋使乘機報復以激其變如農夫之植嘉禾以去稂莠深耕易耨芸耔灌溉專心一事勤誠無惰必有秋穫夫善者益知所勸則助惡者日衰惡者益知所懲則向善者益衆此撫柔之道而非專有恃於甲兵者也至於本院近行十家牌曉諭誠亦弭盜安民之良法而今之有司槩以虛文抵塞莫肯實心推求舉行誠使此法一行則不待調發而

處處皆兵不待屯聚而家家皆兵不待蓄養而人
人皆兵無餽運之勞而糧餉足無關隘之設而守
禦固習之愈久而法愈精行之彌廣而功彌大其
視前項區處摘調之兵有虛名而無實用可張皇
於暫時而不可施行於永久者勞逸繁簡相去遠
矣

覆議

林富

八寨賊巢實為柳慶思恩各賊淵藪今幸征勦之

餘黨類衰息正宜乘據要害控扼吭背誠有如王
守仁所陳者但動衆設險要合人情尤先地利謹
按八寨地方頑山絕地商販不通一也瘴癘疫疾
人無固志二也生理無聊易驅從惡三也凌險孤
居緩急無援四也是皆蠻賊之所居非漢人所堪
也而況賓州為兩江障蔽若撤去南丹衛則兵力
單弱萬一不逞之徒分兵扼阻牽制八寨而大衆
衝突以臨賓州則聲援阻絕力將不支兩江其能

晏然乎故遷南丹衛於八寨非計之得也然八寨蕩平機不容失南丹雖重遷勢不可以遂止何者南丹衛設在賓州既不足以遙制八寨遷居八寨又不得以近護賓州必求彼此相宜緩急可恃以為地方長久之慮者惟在遷南丹衛於三里耳三里之地即王守仁所議改設鳳化縣者也地屬賓州之上林縣平曠博衍多良田茂林南連八寨西達思恩形勢險要可耕可守守仁已備言之矣但

設縣則割賓州之地以益思恩是顧此而失彼也
遷衛則守賓州之險以制八寨以援思恩是一舉
而兩得也又况南丹衛雖遷不出賓州界內土人
熟其地理貧軍利其田產踴躍要行而思恩上林
八寨賓州遷江等地方相去皆不過一二日程聲
息相聞則氣勢自重犬牙相制則覬覦自消故臣
以為遷南丹衛於三里於事體最為得也至若周
安堡委在八寨之中四方賊巢道路所會宜就築

新城建立衙門選委指揮一員駐劄經理將南丹
衛官軍分為兩班番休遞戍其八寨原係遷江八
所土官所轄地方合如王守仁所議量遷四所精
銳官兵以居使之協力防守仍召募右江附近土
官衙門舍人土目但有謀勇出衆隨帶五百人以
上足以制服羣賊者就令統率與遷江官兵俱分
撥賊占田產使之耕種則軍威自振可為一方之
保障矣

藤峽善後議

翁萬達

田汝成
刪本

一曰編保甲以處新民夫苗犛之亂萌於怙險若非別里分疆劇其故宇終為負固宜令江北一帶西自碧灘東連林崗背南度蓼水墾作便田江南一帶東起蒲竹西遶河源亦托處平原遠背山麓但此等新民方就繩檢如放豚憚於罾絡野鹿駭於牢籠故假借過寬則獷越之性仍在約束太驟則簡野之俗弗堪按之故牘曾有准入狼家或附

編民戶者意非不美也但入狼則土蠻蠶食編民則廂里漁侵皆非善政宜倣古人保甲法度十家為甲甲有總五家為保保有長各就族類擇稍有恒業能通漢音者為之仍先計口科糧大約十取其一歲令保長徵催別貯一倉以便會稽授廩之初量給種子五年之後稍派徭差近郊之地各立墟市招致諸徭賈易貨物一月二舉委官董治使無貪攘

二曰立營堡以通江道藤峽上抵柳慶下委潯梧諸郡咽喉也曩者江介諸徭憑據地利厚其徒黨哀光鞠頑今羣兇已剪殘黨歸降威振法行宜與更始但弩灘狼灘兩處徭人既徙平地則遼曠舊穴恐有客賊乘之而賓旅往來不為哨護或有萬一之警兩處灘碕宜各立營堡成以官兵置籍分符嚴律明紀使部伍聯屬彼此應援游艘往來且防且守近堡之地量遷向化良徭環居內外易田

而食則客賊難藏

三曰設督備以控上游藤峽首尾分隸兩江武宣
右江屬邑也實據上游非左江部轄法號稍䟽府
衛公移猶多掣肘所以彼此攜隔應援爲難潯州
原有領哨指揮不必更設宜設督備指揮一員於
武宣駐劄專管峽江調官軍目兵相兼戍捕約以
游艘四十分布兩堡及督備領哨官統之使客商
船下水則武宣遣兵防護直抵潯州上水則潯州

遣兵防護直抵武宣各給符牌以便稽考

四曰改州治以建屯所昔韓公討平藤峽以碧灘盜賊充斥奏改岑鐸部兵二千來任州事岑鐸死部兵漸散以岑猛次子邦佐繼之旋因父猛作亂削職徙閩嘉靖七年新建伯以田州之役欲安反側疏宥邦佐還知本州邦佐復任以來益肆兇殘部民無罪而赤族者無慮數百又占管狼家以爲部落奪其田而賣之如彼私產且貪圖江南吉大

里良村可以獵利窩奸遠離汎地頃以睚眦之怒
嗾諸徭攻營壘目兵死者二百餘人竊惟先年設
州之意實資其兵以為民衛今岑氏部落盡已逃
亡則兵不足資乃徒擁我地譬之贅疣已為不可
况占管非所統率之狼兵而吞併其有以資淫虐
是本以衛民而反以害民本以禦賊而反以通賊
焉可宥也今宜以武靖州改為武靖屯田千戶所
推選賢能軍職掌管軍官不職可以更置異於土

官控要而制遠弭盜以安民實地方之利

五曰清狼田以正疆界成化間左江盜起田土為墟其後民漸復業欲借兵自衛議招歸德思恩等處狼甲徙得護守以絕戶田給之納糧免差年代漸久生黨日繁有司稽考無法原額之外各狼私置亦混狼田姦猾吏民又以逃亡產業招狼住種見戶田稅詭寄狼名所以民田日削民差日重宜選廉幹官員履畝丈量為之疆界備書一冊冊內

狼兵易世而姓名不更自置私田及承佃絕業原
非冊內開載者附本甲為竒零狼戶與民一體糧
差

六曰處款兵以慎邊防左江潯南二府民款凡二
千三百六十八名每名該四十丁石朋當有司官
員罷闔者不能清查貪婪者又輒賣閒竊惟款兵
親當雇當皆為未便獨徵銀雇募驍勇乃濟實用
宜每名每月徵銀五錢在官以充雇直所募之人

不論土著寄居民狼狽獐必求精銳者充之除量
畱有司守護城庫外令各自認五人為伍五伍為
隊隊有甲四隊為哨哨有長四哨為營營有官官
無定員隨時而設隊甲則推選才力稍優者為之
哨長則推選才力最優者為之官得以制哨長哨
長得以制隊甲隊甲得以制伍衆各伍間敢有違
犯紀律者二人以上連坐同伍五人以上連坐同
隊每五人給牌一面備列同隊二十五人姓名使

之連絡習熟謂之伍符每隊各置牌二面編立字號一付隊甲一收分巡道謂之隊符每哨各置牌二面編立字號一付哨長一收分巡道謂之哨符每歲秋冬團集操練或有警調發截殺及戍守營堡即發符取之庶分數素定軍政修舉

田汝成又曰自予涉嶺右按圖牒詢父老躬覽山川然後稍稍知破賊之畧也大抵藤峽府江相為表裏然治藤峽宜速而府江宜緩速則戰無所逃

緩則可得要領蓋藤峽前阻重江後臨大野面勢
雖迂猶可邏遏所慮者東奔耳然南紫荆北羅運
各有間道可以夾攻扼此一隅而三面迫威譬之
釜魚安所逃也故曰宜速至於府江上起陽朔下
抵蒼梧遶遶三百餘里萬山叅錯曲徑盤雲草樹
淒迷疑若禾麥暴客踈伏土著者少而外乘者多
奄忽往來捷若鬼魅一有警急即狼竄麋跳無復
踪跡故欲治府江則恭城平樂懷集賀縣修仁荔

浦永安五屯茶力二山之間皆宜一歲之前屯兵積粟以能者主之熟其嚮道探其險易擾其耕耘賊必且驚且拒營巢負險然後益以外兵諸道並入環而攻之庶可滅也若欲以旬月之間懸軍深入賊必漫走莫可窮搜縱使刊木於山伐石於江亦涉迂踈非長策也故曰宜緩雖然諸蠻縱而惡法慙而易欺衛所之官世掌其土與廂市大家倚法豪舉丁剝而戶漁之食租衣稅視為私人危言

千萬不使一控公門陳情白事得其利則為之掩
隱埋姦誘引剝掠一不當意則宣露宿惡傳以醜
詞聳動官府稍不加察或單軍輕舉失重損威釀
成大禍此則兩江通弊也昔人有言在內曰姦在
外曰宄御宄以德御姦以刑治內詳而治外畧救
寇之策斯其首端乎至於調發土官徃徃方命不
受節制賊未及平而所過良民已遭荼毒為時通
患其弊有二一曰無才二曰納賄蓋土官軍官聯

金史卷一百二
合一體而督府左右尤為腹心世世藉賴故提督
守巡孤立頻徙分隔而情踈易於欺慢寡謀怯膽
則相與構浮言設險械嚇以跋扈令我畏縮若有
罅可投即誘以甘聲啗以珍貨一受結納則無復
忌憚是以軍令不張國法不信積弱之弊非一日
矣故邊方之官非有為不足以戢亂非有守不足
以服人又非久任不足以諳土俗也誠得其人而
任之寬其約束優其寵榮即滿考不代庶蠻人帖

服邊患稍寧耳

貴縣五山介於來賓遷武間皆倚龍山即所稱藤峽右臂也山崇而袤為八寨逋逃淵藪向事招徠乍服乍叛左江持之急則遁而右右江持之急則匿而左橫剽四出民不寧居萬歷二十三年叅將白斯清潛議雕勦而機事不密幾釀大禍督撫二臣檄副使楊寅秋等以計破之餘黨相率請降窮山負谷舉為編戶矣撫臣會督臣採衆議條其善

後事宜以聞

一移置將領以重彈壓五山介在潯柳之間素稱盜區而謝村適當五山之中尤為要地先年曾經設堡於謝村馬鞍金廂然兵力弱而統領無人故威勢不振叛服靡常應於謝村要地修建土城一座創置叅將衙門就令潯梧叅將有事則在彼住鎮無事則逐季巡歷又選用督備指揮一員專駐謝村常川防守庶要害據而威鎮張將佐集而事

權重反側者有所畏而不敢為向化者有所恃以無恐五山可求底安寧矣

一調撥所軍以實重堡貴縣城內已有奉議衛所而城外又有向武千戶所蓋因先年征交南調移該縣見存官二員軍四十三名每名輪戍謝村金廂是二堡乃各軍踐更之熟路也今謝村新堡居民稀少應移全所置於謝村官署軍營與叅將督備衙門同建就令官軍攜家住守蓋該縣有此似

若贅疣而謝村得之則稍壯威聲不惟諸軍免更番之勞而五山亦有守禦之固矣

一棊布營兵以聯聲援據布政司會議謝村重堡合用募兵七十名併調梧鎮戍兵一百名及移向武所官軍居中督備領之自謝村迤西北十五里為馬鞍山通武宣古豪來賓南四白牛則五山後門也應照原堡募兵四十名稍折十里而西為元村管東廖源鶴懷山口通來賓遷江捷路則謝村

後門也應添小堡守以募兵二十名又折而西為寨思堡來賓南四六象山口遷江崑山口謝村之要害也應照原堡添守募兵二十名又迤而南為定藏嶺控制馬羅疊址交通五山之門戶應添小堡守以募兵二十名通前馬鞍元村寨思定藏四堡領以官一員又自謝村迤東北四十里為金廂堡則南四古豪武賴交通龍山之門戶也向有土舍覃柳狼兵一百四十名合今仍舊耕守稍迤而

南為大器嶺龍山五山之通衢也一以控山東山
北蘆荻等賊村一以保固郭西北郭東民村應添
一堡守以募兵四十名狼兵二十名通前金廂大
器二處領以堡官一員又自謝村以南十里為黃
梁橋上應謝村下接北霸墟增小堡守以募兵二
十名三十里為北霸墟則羣賊窺視城廂要路應
添大營守以募兵五十名梧鎮戍兵一百名稍橫
而西為隆笠堡荒僻深阻為各賊窟藏密邇思簡

惡村向以西北狼兵六十名越境遠守無裨防禦
應照原堡守以募兵四十名又折西北之佛子山
即著落山北狼兵六十名守之通前黃梁北霸窪
笠佛子山共四處領以堡官一員蓋五山地方周
圍四百里山深林密姦宄易生非四路置堡則聲
勢不相聯絡非逐堡置戍則倉卒不便策應今以
謝村建鎮城叅備居中彈壓而謝村西北為五山
後門東北通龍山門戶南達貴縣大路均為要害

之區設立營堡添設兵壯把守無事則時令巡緝
可以杜其亂萌有警則互相應援易以遏其出沒
誠於守禦有裨矣

賦役議

楊芳

國初之制百十戶為里丁糧多者為長每里十甲
首戶百即周人比長閭胥之職也圖分十里輪年
應役十年而周公賦公旬皆里正董之一年在官
九年在家故其賦易共而其民常逸歷年漸久徵

輸之制名色繁多曰額辦者以物料為貢有定額者也曰雜辦者藩司承部不時徵派無定額者也
有定額者民猶得按額而輸之無定額者吏巧為名色今日曰奉計部明日曰奉繕部今日曰奉司
文明日曰奉部文今日曰正編明日曰加編頭緒
絲棼里正茫然莫知其措則不得不多方以應之
至於差役其繁滋甚見役里甲賦錢于官曰網銀
曰辦銀有司復懾之令直日供具無名之征紛然

四出即百緡不以抵數窮鄉小民白首不識官府
僱人代直月費數十金里甲大苦及編均徭又復
取盈其最重者莫如庫子夫甲廩保諸役上司行
部使客下車下程夫役之費急如星火而郡邑長
吏諸餽務咄嗟立辦大都廩編一兩費可百餘金
庫子編一兩費可數百餘金至兵役繁興衙蠹蝟
集編派彌多民不勝弊破貲鬻產逃亡者相踵矣
自一條編之法行之兩浙諸藩多倣而行之其法

合一邑錢糧分為四差一曰里甲則課程公費之類也一曰均徭則柴薪皂役之類也一曰郵傳則水陸夫馬之類也一曰兵款則弓兵民壯之類也通括四差之數每歲幾何每米一石酌銀幾何一切僱役官給之費而民不與焉然後編為成書刊為由帖上無以飾憲司之觀下無以掩閭閻之目貧富適均出入有度雖聖喆復生莫之易也至若補偏救弊之權則當責之有司

鹽法議

楊芳

漢元狩四年幹山海之貨置鹽官二十八郡而蒼
梧居其一唐劉晏始行常平鹽官自為市歲得錢
百餘萬緡而軍餼官祿皆仰給焉官之鬻鹽自此
始宋時二廣之鹽皆屬漕司量諸州歲用而給之
廣東地沃民饒商人輻輳故行商鹽廣西廣莫而
凋瘁食鹽無幾商不樂趨故官為般運粵西之行
官鹽自宋然矣元平章也兒吉尼為禦紅巾賊議

甃石城守禦遂捐俸買海鹽獲倍稱之息版築功
成民不告勞粵至今賴焉明尚書唐鐸以長沙寶
慶衡求柳道各郡食鹽甚難廣東積鹽有餘可撐
運到廣西以入湖廣各郡上從其議於是東鹽始
達於湖廣矣隆慶初都御史殷正茂平古田後議
增營伍而左藏稱詘因請于朝效元七兒吉尼故
事而綜理加焉官鹽商鹽各居其半其利息歲可
二萬左藏自是稍贏矣然行官鹽後重繩私販商

人造爲浮言以撼當道總督都御史劉克誨衡人也遂極言官商之非撫臣郭應聘按臣胡宥亦以情聞上下大司農議曰廣西運鹽之議原爲新添兵餉而設一日不可無兵則一日不可無食若西省官運之鹽旋行旋罷兵食俱乏地方坐困咎將誰諉似不可以一時商人之私便而忘地方將來之遠圖也宜從舊議上曰這兩廣都是朝廷地方軍餉比之通商干係爲重這鹽運只着遵炤不許

再議紛更由是官鹽始通而衆喙少息疏請官鹽
百包許帶私鹽十包以優水手使得盡力於狂波
巨浪之中酬勞於嚴霜烈日之下耳議者謂私鹽
之帶非理郭中丞極力辨之紛議始服大都首事
之人長慮却顧故其法似寬而行之可久更事之
人以剔蠹為功故其法常嚴而莫必其後夫豈獨
鹽筴然哉

行均平以蘇民困議

李盤

看得里甲供應之苦嶺南郡縣皆然而懷集尤甚
懷集僅五里各領十冬地瘠民貧梧郡彈丸邑也
舊設供用綱銀俱已奉文裁解事無巨細費無大
小惟里冬是視又孤懸僻遠自縣達府四百餘里
必取道東粵之開建封川原無驛遞夫馬凡送迎
官府答應承差無非辦於里冬比年築隘防猛軍
興旁午苦有不可罄述者里役苦於官府誅求花
戶苦於里役吞剝何言乎里役苦於誅求懷邑山

多田少一里中所領鄉村或百里或數十里足力不可旦夕而徧伺候縣門奔走道路一有急需遲之晷刻追呼及之鞭撻隨之如星如火惡能待其坐派各戶走諭各鄉平一項未了別項又來狎至環生支持無計雖犬馬之勤勞罪囚之憂辱無加於此矣里役之所以可念也何言乎花戶苦於吞剥懷邑地阻氓蚩里長輪年上役先已幫帖使用人戶挨次當日又復照米科財假公濟私頭會箕

斂窮鄉下里雖捨地呼天不能自達於官長而官
長無長目飛耳何從盡見盡聞里役之皮骨僅存
官長尚相看而動念花戶之脂膏罄竭里役惟欲
得而甘心花戶之所以尤可悲也且譚村之米半
於別里科斂供應四里若干故譚村之民一值當
日有事則鬻田於別里別冬田地日少逃亡相繼
勢必驅良民為罷民減五里為四里矣卑職目擊
心傷每思釐正斯弊偶閱連州志載察院條約民

出均平銀兩貯庫凡有公費官為應辦甲首盡放
歸農無容里甲恃強私下差派卑職竊謂斯例可
循因將五里助餉防徭一百名之餉計銀七百四
十八兩兵已散歸於農餉留貯庫凡百公務庫吏
將此項應辦支銷皆與里役無與焉里役可免急
逼誅求之苦花戶亦免陸續吞剝之苦矣伏候轉
詳永為定例

廣西通志卷一百二